

Die örscht heilich Naacht

Hanne Assion-Bausback

Des war e Naacht, sou aartli leis,
kaald, un es hot e bißle g'reischt.
Die Schööf im Pörch gewwe gar ke Ruh,
a der Hund is wach un gauzt dezu.
Der Schöfer find ken Schloof höit Naacht
un hot scho e baar mool die Runde g'macht.
Dort hinne am Waald brennt an no e Licht;
er reibt sich die Eischnoodel aus em Gsicht
un denkt: is dann heint niemed müüd,
weil mer üwweraal no Leewe sieht?!

*

Am Hiemel uff eemool sou e heller Schei.
Es werd doch ke Brand ausgebroche sein?
Des wär ke Wunner, ba derre Kält,
der Schööfer springt noo üwwers Ackerfeld.
Üwwerm Schteebruch, dem aalde, sieht-er den Schei,
un verschrocke gückt-er dort in die Hütte nei.
E jungi Fraa, sou liebli un schöö,
wie er no nie im Leewe hot eeni gsäh',
un hot a no, daß Gott erbarm,
wie er dann sieht, e Kinnle im Arm.
Der Mann dezu is scheint's scho aald.
Er sücht no e baar Bümmerli zamme im Waald,
und was er sunscht no for e Föjerle find.
Durch die Hütte pöift en scharfer Wind.
Was hot dann die vun dheem fortgetriewe?
Wärn se doch in ihrer warme Stuwwe gebliewe!
Der Schööfer kriecht en ganze Zoon,
wann-er des Keed ooguckt, sou blooverfrorn.

En Ejschel häwwe se a debei,
des wern doch ke Zicheiner sei?!

*

Uffgwacht von dem helle Schei
kumme a die annern Schööfer ebei.
Sie sähe den Stern, des helle Licht,
sie krieche Engscht un sie förchte sich.
Wer wääß, was des is mit dem förrije Stern!
Sie betrachte den liwwer emool aus der Fern
un mache sich gleich widder uff die Socke.
Der örscht sejcht: „gell, un mich loßt-er hocke?!
Miich dauert die Fraa mit dem kleene Keed.
Wies denne wohl höit naacht no gejt!
Des Keed is sicher scho halwer verfrorn!“
Er kriecht uff die annern en ganze Zoon.
„Statt dasse derre Fraa ebbs Warms bringe her,
wann's norr en hääße Kaffi wär!
Do renne se fort, denke blouß an sich,
häwwe Engscht vorreme helle Licht!“

*

Des Licht erfüllt a die Hütte ganz
un üwwer die Felder fließt der Glanz.
Wie Diamante glitzert der Schneej.
Dem Schööfer dun die Auche ganz wej.
Un in all dem Leuchde sou wunderbar
ertöne Stimme ganz hell un klar:
„Heut hat Euch Gott Vater den Sohn gesandt,
fürchtet Euch nicht, verkündets im Land!“
Der Schööfer rennt fort zu sanne Löit,
„kummt doch un säht, was der Stern bedeut!
O wie grouß is Gottes Erbarme,
der Heiland is kumme, zu uns, zu de Arme!“